

Regenza grischuna: set cussegliers federals bastan

La Pro Grigioni Italiano è trumpada

■ **(anr/gc) La Pro Grigioni Italiano (PGI) è fitg trumpada che la regenza grischuna ha refusà l'iniziativa da la cumissiun statal-politica dal cussegl naziunal che voleva augmentar il dumber da cussegliers federals da set sin nov commembers.** Tenor la regenza saja il sistem da fin uss cun set cussegliers federals sa cumprovà per il Grischun triling e la represchentananza commensurada da las diversas regiuns dal pajais e regiuns linguisticas haja funcziunà bain.

Tenor la PGI na constettia quai dentant betg. Quai sa laschia sulet cuntanscher cun la necessaria veglia politica.

Grischun talian è mai stà representaà en il cussegl federal

Dapi 1848, cu la constituiziun da la nova confederaziun è ida en vigur, na saja il Grischun talian anc mai stà represchentà en il cussegl federal. En noss chantun triling discurren 10% talian en las «Valli»: Puschlav, Bergiaglia, Mesolcina e Calanca.

1962 fiss il Grischun talian bunamain vegnì tar in cussegl federal. Lez onn è cuss. naz. Ettore Tenchio, da Roveredo, mort dacurt, stà candidat uffizial da la pcd per il cussegl federal. (Vuschs sco candidat aveva el fatg gia 1959, cu i gieva per occupar in sez da la Svizra latina.) Però lez onn ha cuss. dals chantuns Jean Bourgknecht, Fri-

burg, la finala fatg la cursa e 1962 il Vallesan Roger Bonvin.

I sto esser ch'i regeva gia pli baud a Berna l'impressiun e persvasiun ch'il cussegl federal italofoon stoppia derivar dal Tessin. Lez n'è davairas betg vegnì a la curta, siond ch'el ha gì fin ussa set cussegliers federals. L'emprim, elegì gia 1848, è stà il liberal Stefano Francini (1848–1857) ed il davos fin uss il cristiandemocrat Flavio Cotti 1987–1999. Dapi 16 onns ha il Tessin nagin cussegl federal pli en uffizi. Ed uschè ditg na funcziunia era la lescha nuncscritta betg dad avoir ina represchentananza a la Svizra italoфона a Berna. Il chantun Tessin resenta quai fitg e renda adina puspè attent a quest fatg.

Cun ils Rumantschs n'esi betg i bler meglier

Ina pitschna consolaziun per il Grischun talian è ch'i n'è betg i bler meglier cun ils Rumantschs che fan ora 15% da la populaziun grischuna. Els han gì fin uss in sulet cussegl federal, il liberal Felix Calonder (1913–1920), da Trin. El derivava dal circol da Trin che ha dà a la confederaziun na main che trais da quatter cussegliers federals ord il Grischun. Ins po dentant era dir ch'il grond chantun retic na saja betg stà surrepreschentà en il cussegl federal fin uss – cun be quatter da 115 commembers en la regenza federala.